

kirkjunnar, og það sem varðar viðkomandi prófastsdæmi sérstaklega. Kjörnir fulltrúar skulu ásamt sóknarprestum, vera tengiliðir safnaða og Hjálparstarfs kirkjunnar, þeir skulu skipuleggja og stjórna aðgerðum á sínu svæði, eftir því sem þörf krefur.

17. gr.

2/3 hlutar fulltrúaráðs geta ákveðið að leggja Hjálparstarf kirkjunnar niður. Skulu þá allar eigur hennar renna til líknarmála á vegum kirkjunnar, eftir nánari ákvörðun stjórnar og fulltrúaráðs.

18. gr.

Tillögur um breytingar á skipulagsskrá þessari ná fram að ganga, ef þær hljóta fylgi 2/3 hluta atkvæða á aðalfundi og staðfestingu dómsmálaráðuneytisins.

Skipulagsskrá þessi var samþykkt á aðalfundi stofnunarinnar 30. júní 1989. Breytingar voru gerðar á aðalfundi 25. apríl 1992 og aðalfundi 31. október 1998.

Skipulagsskrá þessi kemur í stað skipulagsskrár fyrir Hjálparstofnun kirkjunnar nr. 327 frá 24. ágúst 1992.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 12. janúar 1999.

F. h. r.

Björn Friðfinnsson.

Fanney Óskarsdóttir.

SKIPULAGSSKRÁ

fyrir styrktarfélag klúbbsins Geysis.

1. gr.

Styrktarfélag klúbbsins Geysis er sjálfseignarstofnun með sérstakri stjórn. Heimili og varnarþing er í Reykjavík. Stofnunin ber ábyrgð á skuldbindingum sínum og öllum eigum sínum. Hún er ekki háð neinum öðrum lögaðilum.

2. gr.

Stofnfé stofnunarinnar er 500.000 kr. sem er höfuðstóll bankabókar sem stofnuð er í þessu skyni. Á hverjum tíma skulu vera bundnir fjármunir í stofnuninni, sem að verðgildi á núverandi verðlagi skulu nema 500.000 kr.

3. gr.

Tilgangur stofnunarinnar er að auka tengsl geðfatlaðra við samfélagið með því að reka klúbbinn Geysi þar sem veitt er aðstoð við að útvega geðfötludum húsnæði og atvinnu og stuðla þannig að því að þeir gerist virkir þátttakendur í samfélaginu.

Til þess að stofnunin geti náð megintilgangi sínum er stjórn stofnunarinnar heimilt fyrir hönd stofnunarinnar að eiga samstarf við aðra aðila og gerast í því skyni aðili að samstarfssamningi um lengri eða skemmri tíma.

4. gr.

Stjórn stofnunarinnar er skipuð tólf mönnum og skal fyrsta stjórn stofnunarinnar skipuð þannig: Ingólfur H. Ingólfsson, Ólafur Ólafsson, Styrmir Gunnarsson, Þórunn J. Hafstein, Ögmundur Jónasson, Jón Snorrason, Anna Guðrún Arnardóttir, Lára Björnsdóttir, Hallgrímur Gunnarsson, Helgi S. Guðmundsson, Gunnhildur Sigurðardóttir og Guðrún Hannesdóttir. Heimilt er að fjölga stjórnarmönnum og skipa að auki varamenn ef meirihluti stjórnar samþykkir. Stjórnin skiptir með sér verkum. Starfstími stjórnarinnar skal vera til tveggja ára í senn. Stjórnarmenn velja sér eftirmenn að starfstíma sínum loknum, kjósi þeir ekki að sitja í stjórninni næsta starfstímabil.

Stjórnin skal vinna að markmiðum stofnunarinnar. Hún ber ábyrgð á rekstri, fjárhag og eigum stofnunarinnar og kemur fram fyrir hennar hönd gagnvart þeim sem veita henni fjárhagslegan stuðning. Stjórnin ákveður starfstilhögun stofnunarinnar og setur sér og stofnuninni starfsreglur.

Stjórnin heldur minnst fjóra fundi á ári. Fundargerðir skulu haldnar. Meirihluti atkvæða ræður úrslitum í stjórn stofnunarinnar.

Stjórnin skal árlega boða til opinbers fundar og veita þar upplýsingar um starfsemina. Fundurinn skal auglýstur í dagblöðum.

5. gr.

Tekjur stofnunarinnar eru auk vaxta af stofnframlagi:

- a) Frjáls framlög frá ríki og sveitarfélögum.
- b) Frjáls framlög einstaklinga, fyrirtækja og sjóða.
- c) Áheit og gjafir.
- d) Leigutekjur, vaxtatekjur og fleira.

Fjármunir þeir sem stofnunin á eða eignast skulu ávaxtaðir í nafni stofnunarinnar á sem hagstæðastan hátt í bönkum, sparisjóðum eða ríkistryggðum skuldabréfum. Tekjum og eigum stofnunarinnar má einvörðungu verja í þeim tilgangi sem samrýmist markmiðum hennar.

6. gr.

Stjórnin ræður framkvæmdastjóra til þess að annast daglegan rekstur klúbbsins Geysis og stjórnun hans í sínu umboði og setur honum erindisbréf. Framkvæmdastjórinn skal sjá til þess að klúbburinn Geysis sé rekinn í samræmi við markmið stofnunarinnar og meginreglur Fountain House hugmyndafræðinnar. Framkvæmdastjórinn ber ábyrgð á starfsemi klúbbsins Geysis gagnvart stjórn.

Framkvæmdastjóri situr stjórnarfundum með málfrelsi og tillögurétt.

7. gr.

Reikningar sjálfseignarstofnunarinnar skulu endurskoðaðir af löggiltum endurskoðanda sem skipaður er af stjórn til að minnsta kosti tveggja ára í senn. Endurskoðaðir reikningar skulu sendir ríkisendurskoðun eigi síðar en 30. júní fyrir hvert næstliðið ár ásamt skýrslu um hvernig fé stofnunarinnar hefur verið ráðstafað á því ári. Um reikningshald fer að lögum nr. 19/1988 um sjóði og stofnanir sem starfa samkvæmt staðfestri skipulagsskrá.

8. gr.

Breytingar á skipulagsskrá þessari og ákvarðanir um að hætta rekstri stofnunarinnar skulu samþykktar af 2/3 hluta stjórnarmanna og staðfestar af dómsmálaráðherra. Verði stofnunin lögð niður skulu upphaflegar eigur hennar sem lagðar voru til sjálfseignarstofnunarinnar renna til málefna er varða bættu félagslega aðstöðu geðfatlaðra.

9. gr.

Leita skal staðfestingar dómsmálaráðherra á skipulagsskrá þessari og hún birt í B-deild Stjórnartíðinda.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 13. janúar 1999.

F. h. r.

Björn Friðfinnsson.

Fanney Óskarsdóttir.

SAMÞYKKT

fyrir **Veiðifélag Laxár og Krákár.**

1. Félagið heitir Veiðifélag Laxár og Krákár. Heimili þess og varnarþing er Skútustaðir, Skútustaðahreppi.
2. Félagið nær til allra jarða sem land eiga að Laxá í Suður-Þingeyjarsýslu, frá stíflu Laxárvirkjunar 2 að mörkum Laxár og Mývatns, ásamt Arnarvatnsá, Arnarvatni, Helluvaðsá, Gautlandalæk og Kráká. Mörk Laxár og Mývatns skv. yfirmatsgerð 22. september 1975 eru: Í fyrsta lagi við Geirastaðakvísl við Óshóla, í öðru lagi um Mjó-sund. Jarðirnar eru: Presthvammur, Kasthvammur, Árhvammur, Hólar, Árhólar, Hamar, Hofstaðir, Nónbjarg, Geirastaðir, Haganes, Arnarvatn I, II, III og IV, Litlaströnd, Baldursheimur I og II, Þórólfsvoll, Heiði, Bjarnastaðir, Gautlönd I og II, Helluvað I og II, Laxárbakki, Brettingsstaðir, Ljósstaðir, Auðnir, Þverá, Halldórsstaðir I, II, III og IV, Birningsstaðir, Brúar, Hvoll, Staðarhóll, Grenjaðarstaður, Búvellir, Aðalból, Álftagerði I, II, III og IV, Skútustaðir I, II og III og Grænavatn I, II, III og IV.
3. Verkefni félagsins er að viðhalda góðri fiskgengd á félagssvæðinu og að leigja það til stangaveiði. Félagið tekur til allrar veiði á félagssvæðinu.
4. Stjórn félagsins skipa fimm menn, formaður og fjórir meðstjórnendur. Skulu þeir kosnir á aðalfundi til þriggja ára í senn. Ganga þeir úr stjórninni á víxl þannig að formaður gengur út eftir eitt ár, tveir meðstjórnendur eftir tvö ár og hinir eftir þrjú ár og helst svo sama röð áfram. Enginn atkvæðisbær félagsmaður getur skorast undan kosningu nema sérstök forföll hamli eða hann hafi verið í stjórn í þrjú ár. Kjósa skal tvo varamenn og tvo endurskoðendur til tveggja ára í senn þannig að annar varamaðurinn og annar endurskoðandinn gangi út annað árið og hinir hitt árið. Stjórn félagsins kýs varaformann úr sínum hópi og skiptir að öðru leyti með sér verkum eftir því sem henta þykir.
5. Stjórnin hefur á hendi allar framkvæmdir félagsins milli aðalfunda. Hún fær menn sér til aðstoðar við þau störf í þágu félagsins sem vinna þarf á hverjum tíma og semur við þá um þóknun fyrir. Formaður er fulltrúi félagsins út á við og hefur yfirumsjón með öllum störfum félagsins og fjárreiðum. Óheimilt er öllum að veiða á félagssvæðinu nema með sérstöku skriflegu leyfi félagsstjórnarinnar. Í leyfinu skal tekið fram um veiðitíma og veiðitæki og með hvaða kjörum leyfið er veitt.